



25 November 2014
25 November 2014
P.U. (A) 317

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN PETROLEUM (CUKAI PENDAPATAN) (MEDAN MARGINAL PETRONAS) 2014

PETROLEUM (INCOME TAX) (PETRONAS MARGINAL FIELD) REGULATIONS 2014



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA PETROLEUM (CUKAI PENDAPATAN) 1967

PERATURAN-PERATURAN PETROLEUM (CUKAI PENDAPATAN)
(MEDAN MARGINAL PETRONAS) 2014

PADA menjalankan kuasa yang diberikan oleh subseksyen 22A(1) Akta Petroleum (Cukai Pendapatan) 1967 [*Akta 543*], Ketua Pengarah membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Petroleum (Cukai Pendapatan) (Medan Marginal PETRONAS) 2014**.

(2) Peraturan-Peraturan ini disifatkan telah mula berkuat kuasa pada 30 November 2010.

Tafsiran

2. (1) Dalam Peraturan-Peraturan ini, “medan marginal PETRONAS” ertinya suatu medan sebagaimana yang ditentukan di bawah peraturan 3.

(2) Bagi maksud Peraturan-Peraturan ini, “PETRONAS” adalah singkatan bagi Petroliaam Nasional Berhad sebagaimana yang disebut dalam subseksyen 3(1) Akta Kemajuan Petroleum 1974 [*Akta 144*].

Medan marginal PETRONAS

3. Menteri boleh menentukan suatu medan marginal PETRONAS iaitu suatu medan yang dikendalikan sepenuhnya oleh PETRONAS yang mempunyai rizab minyak mentah yang berpotensi tidak melebihi tiga puluh juta tong tangki stok atau rizab gas asli tidak melebihi lima ratus bilion kaki padu standard.

Pendapatan kasar

4. (1) Dalam menentukan pendapatan kasar bagi PETRONAS daripada operasi petroleumnya yang dijalankan di dalam suatu medan marginal PETRONAS, pendapatan

daripada operasi petroleum di dalam suatu medan marginal PETRONAS hendaklah dikira berasingan daripada operasi petroleumnya yang lain.

(2) Jika PETRONAS menjalankan operasi petroleum di dalam dua medan marginal PETRONAS atau lebih, pendapatan daripada semua medan marginal PETRONAS itu hendaklah diambil kira sebagai jumlah pendapatan kasar PETRONAS daripada semua medan itu.

Pendapatan larasan

5. Pendapatan larasan PETRONAS bagi tempoh asas bagi suatu tahun taksiran daripada operasi petroleumnya di dalam suatu medan marginal PETRONAS hendaklah suatu amaun yang ditentukan mengikut Bab 3 Bahagian III Akta.

Kerugian larasan

6. (1) Dalam keadaan jika tidak disebabkan berlakunya kekurangan pendapatan kasar bagi PETRONAS bagi tempoh asas bagi suatu tahun taksiran daripada operasi petroleumnya di dalam suatu medan marginal PETRONAS, sepatutnya terdapat amaun pendapatan larasan PETRONAS bagi tempoh itu, amaun bagi jumlah semua potongan yang sepatutnya dibenarkan di bawah Bab 3 Bahagian III Akta dalam menentukan pendapatan larasan yang melebihi pendapatan kasarnya bagi tempoh itu daripada operasi petroleumnya di dalam medan marginal PETRONAS itu hendaklah diambil kira sebagai amaun bagi kerugian larasannya bagi tempoh itu daripada operasi petroleum itu.

(2) Kerugian larasan yang ditentukan di bawah subperaturan (1) hendaklah hanya dibenarkan sebagai suatu potongan terhadap pendapatan berkanun PETRONAS daripada operasi petroleumnya di dalam suatu medan marginal PETRONAS.

Pendapatan berkanun

7. Tertakluk kepada peraturan 8 dan 9, pendapatan berkanun bagi PETRONAS bagi tempoh asas bagi suatu tahun taksiran berkenaan dengan operasi petroleum di dalam suatu medan marginal PETRONAS hendaklah ditentukan mengikut Bab 4 Bahagian III

Akta dan dengan mengambil kira Kaedah-Kaedah Petroleum (Cukai Pendapatan) (Elaun Modal Dipercepat) (Medan Marginal PETRONAS) 2014 [P.U. (A) 304/2014].

Elaun modal yang tidak diserap

8. Jika, oleh sebab ketiadaan atau kekurangan pendapatan larasan bagi PETRONAS daripada operasi petroleumnya di dalam suatu medan marginal PETRONAS bagi tempoh asas bagi suatu tahun taksiran, pelaksanaan tidak dapat dibuat atau tidak dapat dibuat sepenuhnya bagi elaun modal yang PETRONAS berhak di bawah Akta bagi tahun taksiran itu, maka sekian banyak daripada elaun itu yang tidak dapat diberikan hendaklah diberikan pada tahun taksiran pertama yang berikutnya bagi tempoh asas yang terdapat pendapatan larasan daripada operasi petroleum di dalam suatu medan marginal PETRONAS, dan bagi tahun-tahun taksiran berikutnya sehingga keseluruhan elaun yang PETRONAS berhak telah diberikan.

Pendapatan boleh taksir

9. (1) Pendapatan boleh taksir PETRONAS daripada operasi petroleum di dalam suatu medan marginal PETRONAS bagi suatu tahun taksiran, yang disebut dalam Peraturan-Peraturan ini sebagai “tahun taksiran yang berkenaan”, hendaklah terdiri daripada amaun pendapatan berkanunnya bagi tahun taksiran yang berkenaan daripada operasi petroleum itu di dalam suatu medan marginal PETRONAS itu ditolak dengan amaun apa-apa kerugian larasan daripada operasi petroleum itu bagi tempoh asas bagi suatu tahun taksiran sebelum tahun taksiran yang berkenaan yang belum dipotong daripada pendapatan berkanunnya daripada operasi petroleum itu bagi tahun taksiran sebelum tahun taksiran yang berkenaan itu.

(2) Suatu potongan bagi apa-apa kerugian larasan di bawah subperaturan (1) hendaklah dibuat sedapat mungkin daripada pendapatan berkanun PETRONAS daripada operasi petroleumnya di dalam suatu medan marginal PETRONAS bagi tahun taksiran pertama selepas tempoh asas yang kerugian itu adalah kerugian larasan, dan, sekiranya ia tidak dapat dibuat, maka potongan itu hendaklah dibuat daripada pendapatan berkanun daripada operasi petroleum itu bagi tahun taksiran berikutnya.

(3) Pendapatan boleh taksir yang ditentukan di bawah subperaturan (1) hendaklah dikira sebagai sebahagian daripada pendapatan yang boleh dikenakan cukai PETRONAS bagi suatu tahun taksiran bagi maksud seksyen 22 Akta.

Pendapatan yang boleh dikenakan cukai

10. Tertakluk kepada seksyen 22 Akta, pendapatan yang boleh dikenakan cukai PETRONAS daripada operasi petroleum di dalam suatu medan marginal PETRONAS bagi suatu tahun taksiran hendaklah terdiri daripada jumlah pendapatan boleh taksirnya bagi tahun taksiran itu daripada operasi petroleum di dalam suatu medan marginal PETRONAS itu ditolak dengan suatu amaun bersamaan dengan apa-apa hadiah wang tunai atau kos sumbangan atau nilai sumbangan yang dibuat oleh PETRONAS dalam suatu tempoh asas bagi tahun taksiran itu yang hendaklah ditentukan mengikut formula yang berikut:

$$\frac{A}{B} \times C$$

- | | | |
|-------|---|--|
| iaitu | A | ialah pendapatan kasar PETRONAS daripada suatu medan marginal PETRONAS; |
| | B | ialah jumlah pendapatan kasar PETRONAS daripada operasi petroleum; dan |
| | C | ialah hadiah wang tunai atau kos sumbangan atau nilai sumbangan yang dibuat oleh PETRONAS dalam tempoh asas bagi tahun taksiran itu. |

Akaun berasingan

11. PETRONAS hendaklah menyenggara akaun berasingan bagi pendapatannya yang diperoleh daripada suatu medan marginal PETRONAS dan bagi pendapatannya yang diperoleh daripada operasi petroleumnya yang lain.